

НА ГОСПОДИ, ВОЗЗВАХ, СТИХИРЫ ВОСКРЕСНЫ, ГЛАС 7

Творение Иоанна Дамаскина.

1. Стих: Изведи из темницы душу мою, / исповедатися имени Твоему.

Приидите, возрадуемся Господеви, / сокрушившему смерти державу, / и просветившему человеческий род, / со безплотными зовуще: // Содетелю и Спасе наш, слава Тебе.

2. Стих: Мене ждут праведницы, / дондеже воздаси мне.

Крест претерпел еси, Спасе, / и погребение нас ради, / смертию же яко Бог смерть умертвил еси, / темже поклоняемся тридневному воскресению Твоему: // Господи, слава Тебе.

3. Стих: Из глубины воззвах Тебе, Господи, / Господи, услыши глас мой.

Апостоли видевше воскресение Содетеля, чудяхуся, / поюще хвалу Ангельскую: / сия слава есть церковная, / сие богатство Царствия: // пострадавый нас ради, Господи, слава Тебе.

Ины стихиры, Анатолиевы, глас тойже.

4. Стих: Да будут уши Твои / внимлюще гласу моления моего.

Аще и ят был еси, Христе, от беззаконных мужей, / но Ты ми еси Бог, и не постыжуся, / биен был еси по плещема, не отметаюся, / на кресте пригвожден был еси, и не таю: / востанием твоим хвалюся: / смерть бо Твоя живот мой, // Всесильне и Человеколюбче Господи, слава Тебе.

5. Стих: Аще беззакония назриши, Господи, Господи, кто постоит; / яко у Тебе очищение есть.

Давидское пророчество исполняя Христос, величие Свое в Сионе учеником открыл есть, хвалима показуя Себе, и славима присно со Отцем же и Духом Святым: первее убо безплотна, яко Слова, по-

следи же нас ради воплощена, и умерщвлена яко человека, и воскресша со властью, яко Человеколюбца.

6. Стих: Имене ради Твоего потерпех Тя, Господи, потерпе душа моя в слово Твое,/ упова душа моя на Господа.

Сошел еси во ад, Христе, якоже восхотел еси: испровергл еси смерть, яко Бог и Владыка: и воскресл еси тридневен, совоскресив Адама от адовых уз и тления, зовуща и глаголюща: слава Воскресению Твоему, Едине Человеколюбче.

7. Стих: От стражи утренния до ноци, от стражи утренния, да уповае Израиль на Господа.

Во гробе положен был еси яко спя Господи: и воскресл еси тридневен, яко силен в крепости, совоскресив Адама от тли смертныя, яко Всесилен.

Ины стихиры Богородице, Павла Аморрейскаго, глас 2.

Подобен: «Егда от древа»:

8. Стих: Яко у Господа милость и многое у Него избавление, и Той избавит Израиля от всех беззаконий Его.

Ты еси Ангелов Радость, Ты еси человеков Слава, Ты верных Надежда, Владычице Всепетая, Предстательница наша: и к Тебе прибегаем во всякой нужди, яко да мольбами Твоими, от стрел вражиих пагубы душетленныя, и всяких скорбей избавимся вси воспевающи Тя, Богоневестная.

9. Стих: Хвалите Господа, вси языцы, похвалите Его, вси людие.

Ты ми Богородице, Упование, Ты ми Предстательница и стена и прибежище, Владычице Препетая, Яже Бога плотию неискусомужно рождши миру Спасителя: Ты мольбами Твоими от одержавших нас избави искушений, и бед и обстояний, Едина христиан Прибежище.

10. Стих: Яко утвердися милость Его на нас, и истина Господня пребывает во век.

Укроти плоти моея стремления, угаси пламень страстей моих, отими от мене, Богородице, зной лукавый желания моего, и непреклонный мой обычай возврати Дево, от всякаго бесовскаго стремления: яко да в тишине сердца, и в безстрастии души моея, песнословлю Тя, Всепетую.

СЛАВА И НЫНЕ: ДОГМАТИК, ГЛАС 7:

Мати убо позналася еси, / паче естества, Богородице, / пребыла же еси Дева, / паче слова и разума: / и чудесе Рождества Твоего сказати язык не может. / Преславному бо сущу зачатию, Чистая, / непостижим есть образ рождения: / идеже бо хочет Бог побеждается естества чин. / Темже Тя вси, Матерь Божию ведуще / молим Ти ся прилежно, // моли спастися душам нашим.

НА СТИХОВНЕ, СТИХИРЫ ВОСКРЕСНЫ, ГЛАС 7.

Воскресл еси из гроба Спасе мира, / и совоздвигл еси человеки с плотию Твоею: // Господи, слава Тебе.

Стих: Господь воцарися, в лепоту облечеса.

Воскресшему из мертвых и просветившему вся, / приидите, поклонимся: / от ада бо мучительства нас свободил есть, / своим тридневным Воскресением живот нам даровавый, // и велию милость.

Стих: Ибо утверди вселенную, яже не подвижится.

Во ад сошед Христе, смерть пленил еси, и тридневен воскрес, нас совоскресил еси, славящих Твое всеильное востание, Господи Человеколюбче.

Стих: Дому Твоему подобает святыня, Господи, в долготу дней.

Срашен явился еси, Господи, во гробе лежа яко спя, воскрес же тридневен яко силен, Адама совоскресил еси зовуща: слава Воскресению Твоему, Едине Человеколюбче.

СЛАВА, НЫНЕ, БОГОРОДИЧЕН:

Под кров Твой Владычице,/ вси земнороднии прибегающе, вопиём Ти:/ Богородице Упование наше,/ избави нас от безмерных прегрешений,// и спаси души наша.

Псалом 33:

Благословлю Господа на всякое время,/ выну хвала Его во устех моих./ **О** Господе похвалится душа моя,/ да услышат кротцыи, и возвеселятся./ **В**озвеличите Господа со мною,/ и вознесем Имя Его вкупе./ **В**зысках Господа, и услыша мя,/ и от всех скорбей моих избави мя./ **П**риступите к Нему, и просветитесь,/ и лица ваша не постыдятся./ **С**ей нищий воззва, и Господь услыша и,/ и от всех скорбей его спасе и./ **О**полчится ангел Господень окрест боящихся Его,/ и избавит их./ **В**кусите и видите, яко благ Господь:/ блажен муж, иже уповает на Нань./ **Б**ойтесь Господа, вси святии Его,/ яко несть лишения боящимся Его./ **Б**огатии обнищаша и взалкаша:/ взыскающие же Господа// не лишатся всякаго блага.

НА «БОГ ГОСПОДЬ» ТРОПАРЬ ВОСКРЕСЕН, ГЛАС 7:

Разрушил еси Крестом Твоим смерть,/ отверзл еси разбойнику рай:/ мироносицам плач преложил еси,/ и апостолом проповедати повелел еси:/ яко воскресл еси, Христе Боже,/ даруяй миру// велию милость. **Дважды.**

СЛАВА И НЫНЕ: БОГОРОДИЧЕН ВОСКРЕСЕН, ГЛАС 7:

Яко нашего Воскресения сокровище,/ на Тя надеющихся, Всепетая,/ от рова и глубины прегрешений возведи:/ Ты бо повинныя греху спасла еси, рождши спасение наше:/ яже прежде Рождества Дева,/ и в Рождестве Дева,// и по Рождестве паки пребываеши Дева.